

A SA PRENDA DE SU CORO MEU

Sa prima die chi t'hapo connottu
 fimus ballende in domo 'e tiu Sanna:
 pizzinnas fisis una truma manna,
 tue sa pius bella fis de tottu.

Finas a tando non ti connoschia,
 però ischia 'e cale zente fisti
 e tue puru 'e me in mente haisti
 sa raighina 'e s'erenzia mia.

Fatt'istat chi tra ballos e risittos,
 ti narzesi ch'in coro ti tenio
 e ch'a isposa mia ti cherio,
 già chi t'haio affettos beneittos.

Pius bella in s'ora ti ses fatta,
 ma no m'has nadu ne "si" e ne "no".
 Deo, intantu, abbizadu mi so
 chi de s'istima mia nde fis grata.

E-i su sero mi so avviadu
 a domo cun su coro mannu-mannu,
 pensende e ripensende si s'affannu
 m'haerat da-e s'ora abbandonadu...

E ch'hat passadu unu mese o piusu
 chi m'has mandadu unu bigliette a cua,
 inue fit sa santa istima tua
 pro cherrer bene a mie fattend'usu.

Ma da-e cussa die fortunosa
 pro nois, istimada prenda 'ona,
 cantas lagrimas lùzzigas corona
 mi faghen sempre in faccia a dogni cosa

de ira, de dolore e de tempesta,
 già chi so fertu che barca in s'iscogliu?
 Ma de sa mente mia in primu fogliu
 est sempre fissa cussa di 'e festa!

E sun passados barantachimb'annos
 guasi 'e cussa die chi so nende
 e m'istas coraggiosa battagliende
 cando m'ides pienu de affannos.

Coraggiu! non t'istracches, sighi ancora
 cun sas istimas a mi cunfortare:
 già chi ses tue sola pro mi dare
 lughe che a sas baddes S'Aurora.

RIMBAMBIU

BAINZU TRUDDAJU

CHIARAMONTI